

四庫全書

集部

欽定四庫全書

集部

宋詩紀事卷五十九

詳校官監察御史臣李陽樾

侍讀臣孫球覆勘

總校官進士臣繆琪

校對官中書臣牛稔文

謄錄監生臣沈世攻

欽定四庫全書

宋詩紀事卷五十九

錢塘厲鶚撰

鄭域

域字中卿號松窗三山人慶元中曾隨張貴謨

使金著燕谷剡聞二卷官幹辦行在諸軍糧料

院

玉藥花

維揚后土廟瓊花安業唐昌宮玉藥判然二物本不同

喚作一般良未是瓊花雪白輕壓枝大率形模八仙耳
山谿野路多見之樵斧摧殘如獼獠比之玉蘂似實非
金粟冰絲那有此花鬚中有碧膽瓶別出玲瓏高半指
清馨靜夜衝九天招隱瑤臺女仙子乘風躍馬汗漫遊
偷折繁香分月姊紫莖柘葉茶蘼條少到尋常人眼底
翰林內苑集賢閣雨露承天近尺咫後人不識天上花
又把山礬輕比擬葉酸而澀供染黃不著霜縑偏入紙
江鄉老少知此名鄭梈瑒音無正字方言土諺隨舌訛

烏馬成焉固應爾

山丹

團欒絳藥發枝閒鉛鼎成丹七返還乞與幽人伴幽壑
不妨相對兩朱顏

以上金芳備祖

黃楊巖

暮秋訪幽隱謝屐凌崩空行到山根門還與平地同舉
手扶層雲下視無高峯疎藤挂赤蚪枯苔糝青茸回首
三神山縹緲滄海東指點笑語高吹聲半天中安得大

鵬背載我遊無窮

延平府志

林 嶠

嶠三山人右科首選慶元中以閣門舍人守潮

州

題觀稼亭

在潮州西北一里湖山下唐貞元閒御史中丞李宿建

咫尺移文喚即應此亭便可配韓亭溪流橫過一灣碧
山色平分兩岸青落日鐘聲鳴遠樹半空塔影倒寒汀
雲烟滿目皆親種留與邦人作畫屏

廣東通志

呂祖儉

祖儉字子約成公弟用父蔭入官為太府丞疏
論韓侂胄安置韶州改吉州量移筠州卒理宗
朝賜諡曰忠有大愚叟集

泛舟至竹洲

沈煥叔晦所居

朝光拍天浮竹洲隱然一面城之幽中有高士披素裘
我欲從之恐淹留探囊百金辦扁舟又煩我友著意修
微風一動生波頭飛棹來往倦則休兀兀坐曹如繫囚

吏餘祇有萬斛愁
一生安坐無幾求
今日棲遲如置郵
脫帽露頂固狂流
俯首折腰亦可羞
誓將入海登之罍
棄置人間繞指柔
蒼然暮色下羊牛
出處語默兩悠悠
九原可起柳柳州
燕坐相與未始遊

至正四明續志

題史子仁碧沚

相家小有四明山
更葺桃源渺莽間
四面樓臺相映發
一川烟水自灣環

中川累石勢嵯峨
城外遙岑聳翠螺
舊說夕陽無限好

此中更得夕陽多

寧波府志子仁名守之心非叔父彌遠所為著
昇聞錄以寓規諫避勢遠嫌退處月湖與慈湖
諸公講肄為樂寧宗御書碧沚字賜之

呂祖异

祖异東萊人

呈洞霄孫元素

匹馬先來破曉雲千章喬木翠繽紛山圍道院窗窗見
泉出丹池處處分酒好便能澆魂魄磊飯香何必御羶葷

明朝又踏紅塵去多羨烟霞總屬君

洞霄詩集

張震

震字東父號無隱居士蜀之益寧人慶元中知

湖州除福建提刑

遂寧府作

春苗半沒脰社酒期滿腹肩輿太守醉燈火歸騎趣唯
有漢月明依然照山曲

方輿勝覽

錢鏊

登慶元間衡州守趙忠定汝愚謫永州至衡道
病登窘之暴薨天下聞而寃之

次袁尚書巫山十二峯二十五韻

文昌仙伯天人姿愛山尋勝如書癡忽摩台符歷參井
麾幢泝峽春遲遲山林川后總效職萬壑千巖俱獻奇
就中巫山絕雄勝插天紫翠相參差神妃來下佩聲遠
駐此名地相安之峯旋地轉自前後屹立萬馬如追隨
兩山有川幻天巧禹功到此神應疲仰天照眼如疋練

舟行掣電翻雲旗迅帆競惜峯巒過餘艖望眼蒙褰帷
懸崖下有欲落石古木上有參天枝龍登鶴聚仙既集
雲昇雨暗天如低從來三峽號至險高牙穩泛相遊嬉
揚旌一覽天下勝詞源倒峽知優為嘗聞奇觀天亦惜
遇賢輒與因其時少陵寓此雖窮寂妙語驚人多在茲
彫鐫萬象發天閔衙官屈宋聲爭馳公今曳履星辰上
調元妙手行將施天教來作東道主歡聲和氣生江湄
公來頓覺雪山重青城增氣連峨眉首驅平陽入新句

一洗前作堪解頤英詞從此徧蜀道迴出塵表無纖縞
嘗憂此地難久駐轉首絕景成嗟嘻直欲使拂素練圖
翠嶷寫松巒起雲之狀模翠屏栖鳳之媚終朝誦公有
聲畫卻來看此無聲詩

全蜀藝文志

趙蕃

蕃字昌父暘之曾孫其先鄭州人南渡寓信州
之玉山用蔭入仕監衡州安仁贍軍酒庫理宗
立除太社令不拜轉承議郎直祕閣致仕卒諡

文節有章泉集

劉漫塘志墓云先生在太和便座有齋榜曰思
隱蓋當筮仕之初已有山林之思在官清苦唯
以賦詠自娛以是受知于吉之鄉先生楊公萬
里贈詩有云西昌主簿如禪僧日飡秋菊嚼春
冰又云勸渠未要思舊隱且與西昌作好春又
贊云貌恭氣和無日下推敲之勢神清骨聳非
山頭瘦苦之容一笑詩成萬象春風

劉後村跋云近歲詩人唯趙章泉五言有陶阮
意

挽趙丞相汝愚

五王不解去三思石顯端能殺望之未到浯溪讀唐頌

已留衡嶽伴湘纍生前免見焚書禍死後重刊黨籍碑
滿地蒺藜誰敢哭漫留楚些作哀辭

方輿勝覽

荅施榮甫

昨韻村中好客希今吟臨水送將歸笑談未了風吹斷
何日重來款竹扉

詩家鼎鑪

上已

朝來一雨快陰晴東郊百鳥間關鳴受風柳條不自惜
蘸水桃花可憐生不見山陰蘭亭集況乃長安麗人行

東西南北俱為客且送江頭返照明

瀛奎律體

哭蔡西山

鵲叫春林復遞詩雁回霜月忽傳悲
蘭枯蕙死迷三楚
雨暗雲昏礙九疑
早歲力辭公府檄
暮年名與黨人碑
嗚呼季子延陵墓
不待鑱辭行可知

柳溪詩話朱晦菴書西山墓碣云嗚呼有宋蔡
季通父之墓歟夫子之書延陵墓也當時哭詩
推此篇為首

句

青雲道遠龍媒老白雪詞高鬼膽寒

贈阮梅峯

韓 澆

澆字仲止元吉之子有高節從仕不久即歸信

上嘉定中卒有澆泉集

書姜白石昔遊詩後

平生未踏洞庭野亦不曾登南嶽峯因君談舊游恍如
常相從江淮歷歷轉湘浦裘馬意氣傳邊烽吾嘗汎大
江祇見匡廬松乘風醉臥帆影底高浪直濺嵐光濃日

暮泊船時是時方嚴冬雪花壓船船背重纜搖枕鼓聲
如鐘當年意淺語不到無句可寫波濤春君詩乃如許
景物不易供盡歸一毫端狀此如飛龍人間勝處貴著
眼雖有此興無由逢錢唐山水亦自好奈何薄宦難從
容南高北高一千丈潮頭日夜鳴靈蹤應有隱者為識
賞青鞵布韞扶杖筇君無詫彼我媿此急還詩卷心徒

松

白石道人詩集附

懷古

近城人語雜深山人語少重露滴烟嵐野水見魚鳥稻
梁豐稔外耕鑿願溫飽所以桃源人不與外人道

少壯既奚為老矣復難强紫芝未必仙采之亦可餉耆
耄八九十道可無俯仰所以商山人辭漢寧獨往

戴石屏哭澗泉詩云雅志不同俗休官二十年
隱居溪上宅清酌澗中泉慷慨商時事淒涼絕
筆篇三篇遺藁在當並史書傳自注聞時事驚
心得疾而死作所以桃源人所以商山人所以
鹿門人三詩蓋絕筆也

七月

水石雲山裏歸來已九秋
隔城如淺近鄰寺始深幽
慧遠逢修靜文淵說少游
徑荒殊不埽風葉上牽牛

雨多極涼冷

焉知三伏雨已作九秋風
木葉涼應脫禾苗潤必豐
地偏山吐月橋斷水浮空
雞犬鄰家外魚蝦小市中

晚雨可愛

燈火涼秋夜空山雨到簷
吹聲初甚少落勢近頻添
籬菊叢叢潤畦蔬種種霑
沈思仍靜聽香鼎伴書籤

以上
瀛奎

律髓

余儔

儔字季倫號癡齋鄱陽人有蛙吹集

題韓仲止壁

謁人久不出兀坐如枯蓼蒼頭前致詞問我何因來士
節久凋喪人情易嫌猜本無性命憂不去安待哉

游宦紀聞余癡齋吾鄉詩人也章泉雅愛之作
書使訪韓仲止及門候謁甚久猶未出余題詩
壁間拂袖去仲止見詩使人追之不返

范模

模字叔範豐城人有竹林類橐

哭趙忠定

日月開黃道乾坤奠渾儀斯人今已矣吾道竟何之玉鉉憂思苦金縢感慨遲仆碑今復立恨不見封彝

鼉董青冥上夔龍紫極邊五龍方夾日九虎已當天夷

險丹心直安危白髮卷弔湘人不去何用解膠弦

南昌府志

姜夔

夔字堯章鄱陽人蕭東夫識之于年少客游妻
以兄子因寓居吳興之武康與白石洞天為鄰
自號白石道人慶元中曾上書乞正太常雅樂
得免解訖不第而卒有白石詩集

題嚴州烏石寺

諸老凋零極可哀尚留名姓壓崔嵬劉郎可是疎文墨
幾點胭脂浣綠苔

鶴林玉露嚴州烏石寺在高山之上有岳武穆
飛張循王俊劉太尉光世題名劉不能書令侍

兒意真代書姜堯章詩云云

姑蘓懷古

夜暗歸雲繞柁牙
江涵星影鷺眠沙
行人悵望蘓臺柳
曾與吳王掃落花

送朝天續集歸誠齋時在金陵

翰墨場中老斲輪
真能一筆掃千軍
年年花月無閒日
處處江山怕見君
箭在的中非爾力
風行水上自成文
先生祇可三千首
回施江東日暮雲

鶴林王露姜堯章學詩于蕭千巖琢句精工有
姑蘇懷古詩云云楊誠齋喜誦之嘗以詩送江
東集歸誠齋云云誠齋大稱賞謂其家嗣伯子
曰吾與汝勿如姜堯章也報之以詩云尤蕭范
陸四詩翁此後誰當第一功新拜南湖為上將
近差白石作先鋒可憐公等皆癡絕不見詞人
到老窮謝遣管城儂已晚酒泉端欲乞疏封南
湖謂張功父也

除夜自石湖歸苕溪

細草穿沙雪半銷
吳宮烟冷水迢迢
梅花竹裡無人見
一夜吹香過石橋

美人臺上昔歡娛
今日臺空望五湖
殘雪未融青草死

苦無麋鹿過姑蘇

黃帽傳呼睡不成
投篙細細激流冰
分明舊泊江南岸
舟尾春風颭客燈

千門列炬散林鴉
兒女相思未到家
應是不眠非守歲
小窗春色入燈花

三生定是陸天隨
只向吳淞作客歸
已拚新年舟上過
倩人和雪洗征衣

沙尾風回一櫂寒
椒花今夕不登盤
百年草草都如此

自琢春詞剪燭看

笠澤茫茫雁影微
玉峯重疊護雲衣
長橋寂寞春寒夜
祇有詩人一舸歸

桑閒篝火卻宜蠶
風土相傳我未諳
但得明年少行役
祇裁白苧作春衫

少小知名翰墨場
十年心事祇淒涼
舊時曾作梅花賦
研墨于今亦自香

環玦隨波冷未銷
古苔留雪卧牆腰
誰家玉笛吹春怨

看見鵝黃上柳條

文獻通考直齋陳氏曰楊誠齋賞此十絕以為
有裁雲縫月之妙思敲金戛玉之奇聲

過垂虹

自譜新詞韻最嬌
小紅低唱我吹簫
曲終過盡松陵路

回首烟波十四橋

以上白石詩集

硯北雜志小紅順陽公青衣也有色藝順陽公
之請老姜堯章詣之一曰授簡徵新聲堯章製
暗香疎影二曲公使二妓習之音節清婉公尋
以小紅贈之其夕大雪過垂虹賦詩云云順陽
公即范石湖

嘉泰壬戌上元日訪全老于淨林廣福院觀沈傳

師碑隆茂宗畫贈詩

深衣跨羸驂杳杳春山路入寺君未知閒看移桂樹
沈碑含秀潤隆畫出神奇道人那得此老子乃耽之

龍井

年時六月海揚塵遙見青山起白雲聞有高僧來誦咒

巖前拋玃問龍君

以上咸淳臨安志

燈詞

燈已闌珊月氣寒舞兒往往夜深還祇應不盡婆娑意
更向街心弄影看

南陌東城盡舞兒畫金刺繡滿羅衣也知愛惜春游夜
舞落銀蟾不肖歸

武林舊事都城自舊歲冬孟駕回已有乘肩小
女鼓吹舞綰者數十隊以供貴邸豪家幕次之
觀而天街茶肆漸已羅列燈毬等求售謂之燈
市三橋等處客邸最盛舞者往來最多每夕樓
燈初上則簫鼓已紛然自獻于下酒邊一笑所
費殊不多往往至四鼓乃還姜白石有詩云云

沙河雲合無行處惆悵來遊路已迷卻入靜坊燈火空

門門相似列蛾眉

遊人歸後天街靜
坊陌人家未閉門
簾裏垂燈照樽俎
坐中嬉笑覺春溫

武林舊事即好事者如清河張府蔣御藥家
閒設雅戲烟火花邊水際燈燭燦然游人士女
縱觀則迎門酌酒而去又有幽坊靜巷好事之
家多設琉璃五色泡燈更自雅潔靚妝笑語望
之如神仙白石詩云云

珠絡琉璃到地垂
鳳頭銜帶玉交枝
君王不賞無人進
天竺堂深夜雨時

武林舊事西湖諸寺惟三竺張燈最盛往往有
宮禁所賜貴璫所遺者都人好奇亦往觀焉白
石詩云云

貴客鉤簾看御街市中珍品一時來簾前花架無行路

不得金錢不月回

武林舊事元夕節物婦人皆戴珠翠開蛾玉梅
雪柳菩提葉燈毬銷金合蟬貂袖項帕而衣多
尚白蓋月下所宜也節食所尚則乳糖圓子餛
飩科斗粉豉湯水晶膾韭餅及南北珍果并阜
兒糕宜利少澄沙糰子滴酥飽螺酪麪玉消膏
琥珀錫輕錫生熟灌藕諸色龍纏蜜煎蜜果糖
瓜羹煎七寶薑豉十般糖之類皆用鏤鑰裝花
盤架車兒孩插飛蛾紅燈綵盃歌叫喧闐幕次

往往使之吟叫倍酬其直白石亦有詩云云

自題畫像

鶴氅如烟羽扇風賦情芳草綠陰中黑頭辦了人間事
來看凌霜數點紅

硯北雜志

句

小山不能雲大山半為天

瞿佑歸田詩話姜堯章句造語奇特

屋角紅梅樹花前白石生

愛日齋叢鈔姜堯章居苕溪上與白石洞天為鄰潘德久字之曰白石道人有句云云白石生見神仙傳中黃丈人弟子也歲煮白石為糧時號白石生堯章用此三字蓋有據

蘓石

石慶元中漂陽令

句

所幸小紅方嫁了不然啼損馬塍花

硯北雜志堯章每喜自度曲吹洞簫小紅輒歌而和之堯章後以疾歿故蘓石挽之云云宋時花藥皆出東西馬塍西馬塍皆名人葬處白石歿後葬此

葛天民

天民字無懷山陰人有小集

癸辛雜識葛無懷初為僧名義鉅字朴翁其後返初服居西湖上一時所交皆勝士有二侍姬一曰如夢一曰如幻

絕句

夜雨漲波高二尺失卻搗衣平正石天明水落石依然
老夫一夜空相憶

看山

我本田夫作比丘也知騎馬勝騎牛如今馬上看山色
不似騎牛得自由

訪端叔提幹

月趁潮頭上山隨舵尾行大江中夜滿雙櫓半空鳴雁
冷來無幾鷗清睡不成平生師友地此夕最關情

西湖泛舟入靈隱山

晴嵐漠漠水溶溶落葉遮船翠蓋重秋色盡為漁者占
山光多向道人濃雲連合抱前村樹礪繞飛來小朵峰

送罷夕陽迎素月樓臺高下自鳴鐘

孤山後寫望

凭高每歎昔人非空有峯峯礙落暉大雅風流誰舉似
長安秋草又衰微寒花負約開猶嬾幽鳥忘機趁不飛
來往半生堪記處西村燈火夜船歸

即事

寒食少逢天氣佳十日九日雨如麻新巢初見燕生子
小巷已無人賣花

六月一日與堯章泛湖

六月西湖帶雨山小舟終日傍鷗閒風烟如許關情久
賓主相推下語難幾點送君歸大雅一涼今夜滿長安
江湖遠思知多少歸去風前各倚闌

荷葉浦中

急雨梢荷分外奇珠璣狼藉錦紛披下塘六月關心處
西塞扁舟入手時卻傍青蘆深處宿還思白石去年詩
平生浩蕩烟波趣月淡風微祇自知

正月二十七日雨中過蘇隄

一隄楊柳占春風
柳外羣山細雨中
人苦未晴渾不到
祇宜老眼看空濛

清明訪白石不值

花薺懸燈柳插簷
老懷那復似餽甜
畫船已載先生去
燕子無人自入簾

以上無懷小集

絕句

二十四友金谷宴
千三百里錦帆遊
人間無此春風樂

樂極人間無此愁

貴耳集云朴翁絕唱

嘗北梨

每到邊頭感物華
新梨嘗到野人家
甘酸尚帶中原味
腸斷春前不見花

山家清供

船子釣灘

澤國茫茫水接天
孰云無法與人傳
見成風月難迴避

盡在華亭一釣船

松江府志

周文璞

文璞字晉仙號方泉又號野齋又號山楹陽穀
人有方泉先生集

貴耳集野齋周晉仙嘗語余曰花閒集祇有五
字絕佳細雨湮流光景意俱微妙野齋灌口二
郎歌聽歐陽琴行金銅塔歌不減賀白

姜堯章金銅佛塔歌

白石招我入書齋使我速禮金塗塔我疑此塔非世有
白石云是錢王禁中物上作如來捨身相飢鷹餓虎紛

相向拈起靈山受記時龍天帝釋應惆悵形模遠自流
沙至鑄出今回更精緻錢王納土歸京師流落多在西
湖寺錢王本是英雄人白蓮花現國主身蛇鄉虎落狗
腳朕何如紅袍玉帶稱功臣天封圻開即退聽兩浙不
聞笳鼓競歸來佛子作護持太師尚父尚書今一枚傳
到白石生生今但有能詩聲同袍秦外鉅師兄哦詩禮
塔作佛事同喫地爐山芋羹何曾薰陸絳牀供但見相
輪銅綠明哦詩禮塔猶未畢蘆葉低飛山雨溼

南華陽洞

稽首游名山，駕言入華陽。南洞極秘怪，松草泉水香。曲
几妙隸畫，殘碣刊靈章。俯首試一窺，冷風襲綃裳。守菴
敬愛客，暖我紫木湯。遺我鵝眼錢，云是洞所藏。往有尋
幽徒，入見黃金牆。侈心或已起，幾受奇鬼戕。身儻獲會
遇，敢恨飛蓬霜。更丐一片土，小築安閒房。朝披神芝圖，
暮試飢飯方。

金牛洞

凌兢下危梯，俛偃入深穴。回身避雲霧，偃面眎日月。藥苗護谿，斫竹節截薛。寧安知幽蹊，下有此大奇。絕金牛，鏤光景仙。謀尚可，閱岡頭春已半。枸杞如點血，便恐顛風興。橫吹石崖裂。

道中望茅山有感

危亭對名岳，畢景扶鉤闌。白鷺伺察過，低昂若弓彎。去歲負笈遊，最佳元符間。櫟林帶脩竹，派流清珊珊。離留叫晝靜，洞天生春寒。偉哉老宗師，作屋雲雨端。竟為殺

蟲蟻不活升龍鸞遺體但解蛻故宮亦燒殘今初已半
舊萬柱扶元壇遂以兩不借一筇履巘岵入宅問玉斧
采芝投金環墨沼篆結字丹臺氣成盤將謂便隱遁遽
亦羅間闕夷甫塵尾墮荀令香爐閒再拜望奇秀恍然
神觀還如見大仙伯初髮綠映山兩君控鶴從俱著漢
小冠俗累當復馳煮藥鼎欲翻

吳中秋日

郊原落葉已離離尚有孤花闌短籬小醉不成憐病後

苦吟未了說愁時
鬪雞走狗索絲喜
臨水登山宋玉悲
豆角已收無別事
待同野老赴襟期

歸憩仁王寺

重到招提未覺遲
鉢單初副袷衣時
僧房齋院門門閉
梅子枇杷樹樹垂
蟻陰經牀求託化
龍纏佛座學慈悲
長年無事閒來此
坐對空山諷小詩

山居書事

茶蘼架倒無人架
全似老夫狂醉時
昨夜一番溪雨橫

又漂苔蘚到花枝

歐陽琴歌

嗚呼箇是文忠琴嗚呼此琴今尚存堂中圖書散失盡
留得七弦傳子孫六字自書書在腹古錦梅花留不得
嗣孫賢者能忍貧不向豪家博珠玉初鼓如撼昭陵松
鞏原流水青溶溶三宗龍袞在帝左留把鈞天賜與公
再鼓似播清潁水祇將漱流月洗耳曾蘇兩生招不來
自寫新聲付兒子堯囚山舜放野自茲以下不平苦與

君所得歸女謗此日一洗清萬古小儒昔誦五季傳頗
訝春秋體微變今來再聽七弦琴南薰遺製喜復見浮
雲流盡白日逃何用廣陵與離騷譜成祇度歐公曲秋
聲賦共廬山高

琴有公題

晨起

閉門不與俗人交元晏春秋日日抄清曉偶然隨鶴出
野風吹折白櫻桃

訪梅

幽花墜在石根傍
幾欲攜將近草堂
草草一尊聊爾爾
跨驢歸去月荒涼

山樂官

山樂官爾誰魂
逃河入海俱奔奔
伶倫梨園何可論
山樂官予欲爾
今無言如有言
為予歌雲門

大滌洞

嵌空纔入泉
滴滴隔凡倒懸
若錐立道士云
是閭丘公
入向華陽便門出

題鍾山

往在秦淮問六朝江樓祇有女吹簫
昭陽太極無行路
幾處鵝黃上柳條

壽星寺聞子規

莫向空山惱病僧暮雲臺殿異鄉人
多時不識巴江路
守著濃花哭過春

以上方泉先生詩集

題洞霄宮

久知靈境無緣到今被春風引得來
上帝殿頭聞雨過

仙人石面欠花開，便燒沈水禮三拜。
快引流霞酌一杯，落日斷霞催去緊。
棹巾祇等白鴉回。

洞霄詩集

潘 耒

耒字德久，永嘉人。舉進士不第，用父賞授右職。
為閤門舍人。福建兵鈐有轉菴集。

葉水心序：德久十五六，詩律已就。永嘉言詩者皆本德久。讀書評文，得古人深處。

劉後村跋：元祐間，最為本朝文章。盛時，惟賀方回、劉季孫不緣師友，頡頏其間。雖坡谷亦深嘉。屢歎其後有劉翰武子潘耒。德久尤為項平菴葉水心賞重。

送友人游金陵

酒盡談餘意轉新
北風一舸下寒津
遙知白下登樓處
正欠黃初著句人
往事生來多歲月
舊遊疎似曉星辰
半山斜日荒涼寺
更有殘碑待拂塵

出郭

酤酒三家市題詩十里塘
薄雲鷗外影空翠馬頭香出
郭知無事尋僧有底忙
終當成野逸小築近滄浪

歲暮懷舊

白髮將朱顏一去幾時返懷哉不能寐展轉復展轉雀
噪曉窗白雞鳴芳歲晚梅花眼中春故情千里遠

還自錢塘道中

江上青山落照邊江頭歸客木蘭船春鷗自共潮回去
一點飛來是柳綿

自滁陽回至烏衣鎮

行人元不恨長途下馬旗亭酒可沽回首琅邪山不見
西風吹起豆田烏

以上前賢小集拾遺

姜堯章自號白石道人贈之以詩

世間官職似撈捕采到枯松亦大夫白石道人新拜號
斷無繳駁任稱呼

書姜白石昔游詩後

我行半天下未能到瀟湘君詩如圖畫歷歷記所嘗起
我遠游興其如鬢已霜何以舒此懷轉軫彈清商

以上白石道人

集附

鷺

銀潢何限鵲查查看得橋成度寶車如許風標無用處

年年分占水蒨花

詩家典故

麗春花

梁苑花銷去黃臺早自薰不同鶯子粟別是石榴裙

娜纔勝掌參差莫夢雲王郎尋水竹駐履幾殷勤

合璧事類別集

題釣臺

蟬冠未必似羊裘出處當時已熟籌但得諸公依日月
不妨老子臥林丘英雄陳迹千年在香火空山萬木秋

自笑黃塵吹鬢客，愛來祠下繫孤舟。

上龜山寺

菜花開處認遺基，荒屋殘僧未忍離。
寺付丙丁應有數，岸分南北最堪悲。
金鈴塔上如相語，鐵佛風前亦皺眉。
野匠不知行客意，競磨濃墨打殘碑。

以上瀛奎律體

遇舊有感

人間百寒暑，正似須臾期。
當年同袍子，一見雪滿頤。
不惟形容改，亦復聲音移。
坐定問姓字，始省從師時。
見此

發永歎勞生果何為不如多飲酒滿腹同鴟夷

客舍

急雨鳴空壁輕寒上薄幃愁多空被酒夢短不成歸暗想桃花落遙憐燕子飛偷兒欺客寢夜靜卷春衣

雪上簡婁舜章

雞頭旋煮蓮新拗簇鳳排花鱠更鮮清夜故人忻客到小船載酒大船邊

平江道中

不載圖書載酒杯姑蘇臺下小徘徊東風不識人心老
擺柳吹花一併來

以上東坡詩集

沈繼祖

繼祖富川人慶元中御史有梔林集

寄題新昌簿廳綠陰亭

洛下追收黃耳信林間聞剗綠陰亭千章古樹虛簾接
四月清風羽扇停兄弟頭顱時感歎江湖歲月久飄零
對牀夜話知他日幽賞何如得細聽

瑞州府志

王遂

遂字去非一字穎叔金壇人嘉泰二年進士理
宗朝歷江西安撫使權工部尚書卒諡正肅

題蘓端明書天慶觀乳泉賦後

陵陽李心傳云此軸蓋
蘇公元符北歸所書

天一生兮上浮羽人
族兮丹丘邈儋耳兮
東注夾崑崙兮倒流
式古堂書考

曹 幽

幽字西士號東圃溫州瑞安人嘉泰二年進士

擢祕書丞倉部郎累遷知福州寶章閣待制致仕卒諡文恭

暮春

門外無人問落花綠陰冉冉徧天涯林鶯啼到無聲處

春草池塘獨聽蛙

後村千家詩

題括蒼馮公嶺二首

平蕪千里綠迢迢水宿山行好耐勞最是愁人最奇崛
馮公之巘浙江潮

村南村北梧桐樹山後山前白菜花
莫向杜鵑啼處宿

楚鄉寒食客思家

梅礪詩話

楊柳

春至風花各自榮就中楊柳最多情
自從初學宮腰舞

直至飄綿不老成

詩林萬選

詠緣竿伎

又被鑼聲送上竿者番難似舊時難
勸君著腳須教穩
多少旁人冷眼看

齊東野語趙南仲以誅李全之功見于趙清臣史撥每左右之遂留于朝其後恢復事起遂分委以邊面赴鎮日朝紳置酒以餞適有呈緣竿伎者曹賦詩云云師果不競

劉鎮

鎮字叔安南海人嘉泰二年進士學者稱隨如先生有隨如百詠刊于三山

贈隱者

夫子生東野經年不到城愛吟無俗趣貪畫得閒名荒徑侵山影虛堂出燕聲我慙為謫吏泉石負幽情

後村千家詩

鄭鄭夢

鄭夢建安人

游洋州崇法院

曉色熹微麥隴間杖藜徐步扣禪關
兩澆水足東西堰一抹雲收南北山
世路飽諳驚歲晚佛巖燕坐覺身閒
故園早辦歸來計莫待星霜滿鬢斑

陝西通志載此詩跋云建安先生得句法于石湖范公早以文章名世今觀是詩如藍田之珍荆山之璞不假雕琢而自為至寶僧正顯刻之精藍當山水清絕處乃復著此澄澹簡潔之語

使讀之當有蕭然脫去世網之意者矣嘉泰癸亥四月既望洋州教授張續跋

龔頤正

頤正本名敦頤光宗受禪改今名字養正相之子嘉泰中國史院檢討官著芥隱筆記及元祐黨籍列傳譜述續釋常談

泰伯廟迎享送神辭三章

翼翼兮新宮蘭櫓兮杙桂氛總總兮高靈下隊君視八紘兮昔何殊于棄屣今復何有兮一席之墮惠我吳人

兮曷日以弭吁嗟君來兮我心則喜君來不來兮我忘

食事 迎神

登歌兮堂上屢舞兮堂下君來享兮清醑溪毛陸離兮

筐筥鯽鱸芳鮮兮亦有肥羜君不來兮使我心苦 享神

車兮載旃舟兮揚颿鼓咽咽兮君當還君月來兮尚盤

桓我心煢煢兮其無端君不我留兮下土毖福我吳人

兮無疾與患千秋萬歲兮歌至德以何言 送神

吳郡志

張達明

達明嘉泰中知吳江縣

題吳江甘泉

在石塘第四橋下陸羽茶經品為第四張又新品為東南第六

橋下四榆水人間六品泉松陵無魯望山茗為誰煎

吳江縣志

朱軾

軾字叔止翌之姪嘉泰閒知南劍州

題汪浮溪先生墓

名高從昔毀相隨未免羣兒著力擠一日狼心萌偃月
十年豹霧隱愚溪不逢華旦開昌運終抱沈埋返故棲

已矣九原寧可作蕭蕭古木亂蟬嘶

游宦紀聞



宋詩紀事卷五十九

欽定四庫全書

集部

宋詩紀事卷

六十一

詳校官監察御史_臣李陽樞

總校官進士_臣繆琪

校對官中書_臣牛稔文

謄錄監生_臣錢萬卷

欽定四庫全書

宋詩紀事卷六十

錢塘厲鶚撰

黃順之

順之字佑甫邵武人開禧元年進士

聽悟師彈招隱

悟師手攜清風琴為我再奏招隱吟九原靈均不可作
後人遺恨空沈沈我今聽之淚霑襟楚山日落秋聲起
古猿啼月空山裏千年愁思上青楓幽蘭無香桂花死

吾道非耶何至此曲中歷歷分明道苦怨王孫負春草
歲晚山中難久留憶君一夕令人老王孫王孫知不知
琴心招君胡不歸下沿湘江之水流上逐湘山之雲飛
一彈一招一太息水流雲飛朝復夕

送葉靖逸

山高積雪明歲序冉以逼佳人抱書去西湖失顏色清
夜獨慷慨詩壇夢生棘我有雙鯉魚對之不敢食

初寓橫涇

十年泉石夢及此始依然野迴天垂地身閒日抵年稍
欣聞見少漸與土風便分得漁樵席白雲相共眠

題九曲尼院

曾是霓裳第一人曲終認得本來身多年不作東風夢
閒卻薔薇一架春

觀冷水峪桃花

石家步障久成塵移作包山一段春惆悵日斜原上路
年年紅雨打行人

以上前賢小集拾遺

韜光菴

瘦筇拄到古韜光分得山僧半榻涼幽鳥一聲春夢斷

溼雲漠漠護殘香

咸淳臨安志

李宗勉

宗勉字強父富陽人開禧元年進士理宗朝拜
參知政事左丞相兼樞密使卒贈太師諡文清

題六和塔

經從塔下幾春秋每恨無因到上頭今日始知高處險

不如歸去卧林丘

咸淳臨安志

危和

和字祥仲逢吉弟號閒靖居士又號蟾塘開禧
元年進士知德興縣有蟾塘集

積翠樓

著我高遠堂恍若非人世一榻臥白雲清寒不成寐松
竹四山秋颼颼驚客耳誰在隔窗中朱弦寫流水

撫州府志

陳垓

孩字漫翁閩縣人密學襄六世從孫開禧元年
進士官至淮東提刑

絕句

硯乾筆秃墨糊塗半夜敲門送省符擲得么么監獄廟
恰如輸了選官圖

吹劍錄陳漫翁監轉般倉與鎮江守喬平章爭
一事平章乞回避漫翁得獄祠吏持牒索回文
漫翁就書
一絕云云

華岳

岳字子西貴池人為武學生開禧元年上書請
誅韓侂冑蕪師旦下大理鞠治編管建寧園土
中侂冑誅放還登嘉定武科第一為殿前司官
以史彌遠當國謀去之事覺下臨安獄杖死東
市有翠微南征錄

春暮

麥髯豆莢雨生肥閒錄園林粉蝶飛
騰真好花安四壁
不教人道是春歸

游溪西寺次府判湯丈韻

寺覺重遊好僧期後會賒青蟲雕病葉白鳥篆平沙水
瘦石生齒山寒梅未花功名應有待且謁惠公茶

別館即事

十年客裏過春光客裏逢春分外狂半堵碧雲蝸路溼
一簾紅雨燕泥香銜山西日辭香閣拍岸春風趁夜航
莫向錢塘蘇小說東吳新髻李紅娘

以上翠微南征錄

呂聲之

聲之字大亨新昌人官宿松尉徙平陽丞終昭
信軍節度推官有沃洲雜咏

賀葉司業兼中書舍人

英妙才華四十年山林朝市姓名傳何妨萬斛橫江上
不礙千帆過目前我肯尾書千木紙人饒首著祖生鞭
金鑾何日商風雅伴直能呼孟浩然

丹丘道中

夜宿溪頭十里村數星魚火照籬門鴈山峭絕經行處

猶帶煙霞入夢魂 以上四朝詩

嚴大猷

大猷蒼溪人特奏名官隆慶府參軍

句

笏未到身難擊泚兵如入手易擒吳

萬姓統譜吳曦僭蜀大猷詩云云

王翥

翥字一飛成都人篤學尚氣吳曦謀反來請翥

陽病風瘖潛往安丙謀誅曦事定匿巴中為農
終身

送張判官歸巴州

回首三巴曲平生萬里橋衣冠無賴客花月可憐宵

灌口秋漲

所向愁無地窮源欲上天蛟龍胡爾怒鷗鷺更誰憐萬
里朝宗意羣兇跋扈年生涯秋色裏獨立問漁船

吳宣撫故宅

社稷疲奔命乾坤服至誠扶持三蜀在出入兩朝榮豕
犬有遺恨麒麟空復情家聲墮已盡國法用猶輕成季
翻無後花卿浪得名門庭黃鳥語几杖綠苔生威福何
偏重精神恐不平庶幾蒙世立凡百慎持盈

憶舍弟

藥物吾仍病花時汝未歸不眠愁月落獨立看雲飛詩
禮自持律飢寒誰解圍遙知理舟楫西望涕沾衣

以上
谷音

方信孺

信孺字孚若興化軍人以廕補官開禧中假朝
奉郎使金三往返不詘歷淮東轉運判官知真
州至廣西漕有好菴游戲詩境集

劉後村序公詩文操簡立成宮羽協諧經緯麗
密

題龍隱巖

春波飽微綠斗柄涵空明方舟貫巖腹鵝鵲相酬鳴仰
窺穹窿頂宛轉百怪呈僅餘鱗甲碎不見頭角擗下闔
清泠淵演迤萬頃澄但同魚鳥參勿遣蛟龍驚扶苔撫

奇篆倚權看題名三將標殊勲自與山不傾誰歟贅小
築正恐嗔山靈南洞更幽絕仙佛依崢嶸太虛可為室
豈復資欒楹乳泉助茗椀中有冰雪清何須驂鸞去此
即白玉京來不速客抱琴忽遲迎愛此無絃曲巖溜
同一聲為我洗塵耳喚我詩魂醒祗愁白衣到好句無
繇成

桂州黃潭舜祠

西風攪桂樹落日明楓林遊子懷歸期余悲渺登臨虞

山一何高湘水一何深英皇僅枯冢寂寞南薰琴我欲
奏古曲俗耳更哇淫古器不可見聊作相思吟相思長
相思相思無古今一歌衆鳥聽再歌萬籟沈推手君勿
歌有酒且孤斟落落此時意寥寥千載心五絃毋庸絕
四海誰知音

重題龍隱巖

愛山那惜走千回生怕前驅後騎催石上參差鱗甲動
眼中在處畫圖開驂鸞未辦乘風去浮鷁何妨載雨來

人事百年俱變滅祗應題字不塵埃

以上曹氏歷代詩選

游九言

九言字誠之建陽人父嘗湖南安撫參議官九
言筮仕古田尉開禧中知光化宰充荆鄂宣武
參謀官卒端平中特贈直龍圖閣謚文靖有默
齋遺藁

金陵野外廢寺

寒花窈窕蔓頽牆古寺蒼苔畫掩房犬吠屋頭山杳杳

蟲鳴堦隙草荒荒池塘淡日蒹葭冷籬落西風橘柚黃
六代江山金碧地斷碑留得管興亡

聽鄭三彈雙韻子歌

寒窗積雪生虛明玉壺風折層簷冰朱霞秀色妙公子
理弦燈下高亭亭遊絲兩兩挂孤月雙聲應手無畱停
月寒坏戶砌蟲泣雲凍出浦邊鴻征蒼蠅撲紙窗欲透
螺贏穴桑兒未成琵琶寬詳雙韻切含悽盡向弦中說
酒酣疏綺雜娛嬉誰道壯夫心更折一從羶毳被河山

學得聲容難辨別鷓鴣金屋沸歌吹鼠頭寶陌行鞞鞞
怕腰慢舞作彎弧捉耳醵觴真折戟眼前猶聽舊歌辭
鳳韶豈獨鏘虞時罷彈三喟寢不熟風定寒江靜夜悲
以上默齋遺稿

美人倚樓圖

簷頭燕子說春寒胡蝶悠悠午夢殘睡起高樓多少恨
天涯小雨怯闌干

溪上

烟開曉日照溪頭
溪上人家岸下舟
啼鳥不知春已老
數聲啼破碧巖幽

以上詩家鼎鑪

游儀

儀字伯莊長平之勝士
早遊京師自北方縱覽
名山已而浮洞庭歸隱
武溪之上

黃鶴樓

長江巨浪拍天浮
城郭相望萬景收
漢水北吞雲夢入
蜀江西帶洞庭流
角聲交送千家月
帆影中分兩岸秋

黃鶴樓高人不見卻隨鸚鵡過汀洲

詩人玉屑按柳溪呂炎近錄云伯莊此詩膾炙人口游默齋嘗書真南樓游受齋漕湖北日復為之刻石

游 憫

憫字憲武

金精山歌

皺裙蹙鳳金屈盤秦釵衛鬢香添寒洞庭波橫嬌不起
舞娥拂桂棲孤鸞寶光瑞色元宮闕碧峽瑤草春漫漫

霜刀如泥割蒼玉樓綃閣綺白日閒楯花紅飛洞雲溼
驚雷挾空老蚪泣崖前紅落霞不流縞衣丹使杓衡急
君不見石髮流漿翻柱礎弱水液橫天上乳西方七宿
欂櫨檜長沙地遠豐鐘鳴

金精風月

趙 靡 一作雍

靡號竹潭忠簡後人開禧間為處州太守

雪夜黃州城下

雪後人家早閉門江寒水落見沙痕黃州城下東坡路

月浸梅花正斷魂
詩林萬選

煙雨樓
在處州

畫棟飛雲暮靄寒
樓臺城堞有無門
煙收雨霽曾看否
見盡東南萬疊山
括蒼彙紀

高孝琦

孝璫字公純
臨邛人生開禧中
魏了翁表叔

臨安西湖

朱簾白舫亂湖光
隔岸龍舟棹夕陽
今日懽遊復明日

便將京洛看錢塘

魏鶴山題跋

李 丙

丙字仲南官左修職郎監臨安府都鹽倉

夜夜曲

玉窗結怨歌幽獨弦絕鸞膠幾時續銅龍漏促春夜長
冷雨酸風亂心曲閒熏翠被鬱金香拂拭繡枕屏山綠
飛飛乳燕歸不歸寂寞流蘓帳前燭

前賢小集拾遺

高 翥

翦字九萬餘姚人有菊礪小集

過臨平

征帆一似白鷗輕
起揭蓬船看曉晴
梅子著花霜壓岸
自披風帽過臨平

春日湖上

清波門外放船時
盡日輕寒戀客衣
花下笑聲人共語
柳邊橋影燕交飛
曉風不定棠梨瘦
夜雨相連薺麥肥
最憶故山春更好
夜來先遣夢魂歸

重午懷舊

獨守空庭日欲晡
滿斟濁酒不須沽
白頭兄弟三年別
青眼交游一字無
醉看葵榴懷舊事
饒思櫻笋夢吾廬
向時癡絕今愁絕
自讀離騷些老夫

初聞雷

二月寒猶在春雲溼
未開灑窗終夜雨
發軔數聲雷
薺麥綠生腦
棠梨紅拆腮
西湖花事動
從此日徘徊

無題

風竹蕭蕭淡月明孤眠真箇可憐生不知昨夜相思夢
去到伊行是幾更

秋興

數聲新雁夜初長曉起開門衣袂涼籬菊褪黃秋興嬾
瓦溝才試一痕霜

題二小姬扇

慶娘顰翠眉春瘦怯羅衣笑問采花蝶如何成對飛
湘湘未識羞獨坐抱筵篴貪學耆婆舞擡身拜部頭

恭跋思陵宸翰拓本卷後

淡黃越紙打殘碑盡是先皇御賜詩白髮內人和淚讀
為曾親見寫詩時

下塘二首

河水新添三尺高河邊蘆葦有龜巢波流夜夜飄魚箔
空點籃燈照樹梢

日出移船日又斜蘆根時復見人家水鄉占得秋多少
岸岸紅雲是蓼花

輦下酒市多祭二郎祠山神

簫鼓喧天鬧酒行
二郎賽罷賽張王
愚民可煞多忘本
香火何曾到杜康

過平原故相宅

拂曉官家簿錄時
未曾吹徹玉參差
旁人不忍聽鸚鵡
猶向雕籠喚太師

以上菊礪小集

齊東野語韓侂胄久用事欲立奇功以固位首
謀北伐出師諸將相繼潰敗金人渡淮圍楚州
遣方信孺奉使通謝信孺回言金人欲太師首
級侂胄怒謀再用兵楊后俾榮王入奏復命史

彌遠錢象祖衛涇王居安張鉞誅侂冑時開禧
三年十一月二日侂冑愛姬三夫人號滿頭花
者生辰張鉞移庖府中酣飲至五鼓其夕周筠
聞其事遂以覆帖告變侂冑已被酒叱曰誰敢
遂升車而去甫至六部橋殿司夏震聲諾於道
旁曰有旨太師罷平章事日下出國門語未竟
健卒百餘人擁其轎出至玉津園夾牆內擗殺
之

西湖暮歸

風荷百頃占漣漪煙樹冥濛乳燕飛
買斷小舟休喚客
暗穿萍葉載詩歸
咸淳臨安志

感懷

漂泊南州又過年
恰如杜子客鄜川
酒堪度日難為醉
詩怕傷時未可傳
店舍無煙兵火後
街坊有月試燈前
荒涼古驛聞吹笛
老淚縱橫落枕邊

拜林和靖墓

玉函香骨老雲根
占斷孤山水月村
薦菊泉香涵竹影
種梅地冷帶苔痕
生前已自全名節
身後從誰問子孫
惟有年年寒食日
遊人來與酹清尊

以上詩林萬選

春詞

鬪草歸來上玉階
香泥微汚合歡鞵
全籌贏得無人賞

依舊春愁自滿懷

貴耳集

李熙輔

題真空閣

括蒼山上雲山好
雲亦好可憐山下僧
看雲不知老

赤城志

志

李迎

迎字彥將濟源人
通判明州有濟溪老人遺橐

句

籍甚人言易已東

陳振孫書錄解題李迎彥將永嘉周浮沚先生之壻與先大父為襟袂集中有送先君子赴戊子秋試詩首句云云蓋先君治易故也

朱 鵠

鵠字子大

奉題周南仲正字所藏閻立本畫蘓李別

少卿昔在河梁別執手踟躕不能發萬古初傳五字詩

努力相期在明德子卿海上羶為食故人竭來重相覲
不覺看羊度歲年卻因射雁傳消息人間此是長別離
少卿在虜子卿歸歸歟尚握漢臣節留者永衣胡人衣
天長地闊半尺絹滿眼雲愁風景變一人仰叫頭脫冠
一人橫涕袞著面閭君國相稱畫師未必想像能爾奇
前身恐是胡婦子曾見兩公分袂時

前賢小集拾遺

陳炳

炳龍泉人官提轄文思院有退菴集

資福院平綠軒

水屋圍春綠雲嵐送晚青無心向朝市信步到禪局野
境連天遠疎鐘隔岸聽杯行莫辭醉簷月笑人醒

白髮流年迅青春盡日間烟消漁舍出風約擄聲還往
事空搔首微官祇強顏漂零那對此歸夢繞雲山

志

至元
嘉禾

柯夢得

夢得字東海莆陽人屢上春官不第後以特科

入仕有抱甕集

陌上桑

朝采陌上桑暮采陌上桑一桑十日采不見薄情郎正是吳頭桑葉綠行人莫唱江南曲

見舊題壁

小遲點筆醉還嘖畫斷蕭梁古佛塵今日重來應抵掌十年分付未逢人

晚望

無數寒鴉來遶鐘物華心跡偶然同不知海北江南路
更有愁人立晚風

以上前賢小集拾遺

夢蜨

一覺千年一轉機覺來還是夢還非當時夢裏知為蜨
便好穿花傍水歸

劉後村詩話

吳伯凱

伯凱字虞賓

夏夜書所見

吳牛見月喘引重不得休孤螢出露草意行淩九秋形
大苦見役物微長自由世無漆園吏持問逍遙遊

前賢
小集

拾遺

鮑 壑

壑字份甫

仰止亭

昔年曾此戀青山幾度秋風入夢寒想得玉岑迴合處

夕陽依舊滿朱闌

前賢小集拾遺

李叔達

叔達字穎士

舟中聞木犀

地近孤城水合流
天風吹下廣寒秋
巖花似喜幽人至

先遣清香到小舟

前賢小集拾遺

馬并

并淮南人

金庭觀

右軍學業隱林丘世隔年餘景尚幽苔鎖一泓殘墨沼
雲遮三級舊書樓欣逢羽客開金闕快覩仙童侍玉旒
自怪今朝脫肌骨飛身得向洞天遊

剡錄

金嘉謨

魚籟

芒葦織簾箔橫當湖水秋寄言魚與蟹機穽在中流

蟹畧

蔣廷玉

廷玉字太璞

淨刹

碑上文難讀開山失所傳巖松秋落子石井下添泉地

曠常多月厨寒不起烟昔年曾有虎來到寺門前

前賢小集

拾遺

揚州

一馬揚州路桃花幾樹花春光無揀擇淮地亦繁華日

沸長江水風昏古壘沙爭雄舊時事君去莫思家

揚州府志

霍洞

洞字太清武進人崇寧大魁端友從孫居城東
梅坡自號筠寮

宿田舍

北風吹晴屋滿霜翁兒赤體悲無裳閨中幼婦飢欲泣
忍飢取麻燈下績一身豈暇私自憐鳴機軋軋明窗前
織成五丈布翁作襴裙兒作袴明朝官中催租急依然
赤體當風立

歲饑太守春遊呈以絕句

朝來五馬去尋春
誰信家家甌有塵
枕藉道傍宜細問
恐非芳草醉眠人
以上咸淳毘陵志

朱 嘗

嘗字介然

采菊亭

霜降草木落園菊發幽姿風流賢史君採掇訢忘疲雅

尚已千載載詠閒居詩佳處要領畧坐見花陰移

前賢
小集

拾遺

張德象

寄沈菊山

八十乾淳老生涯半子虛久無朝士餽空有故人書詩
道窮方進塵緣老盡除茫茫天壤闊誰復是知予

翰墨大全

惠端方

端方字敬之廸之子永嘉丞

梅花

美人在空谷抱志苦貞潔素衣飄白雲容色貶春雪臨

風一笑粲皓齒何瑩徹破鏡忽上天寒影浸瑤闕

前賢
小集

拾遺

張道元

金焦行次梁必大韻

二山砥柱江流中下有水府之幽宮巨靈設此天險重
怒濤欲起兩伏龍山光對面山淡濃朝暮雲起相過從
鐘聲兩樣飄江風撞驚大夢醒塵甯海門茫茫直其東
江山第一麗且雄六朝形勝留遺蹤天荒地老代不同

登臨此地閱幾翁公獨硬語盤高穹長江滔滔去不已
千古名山占蕭寺白髮印公心水止嗟予勞生竟何似
人門平地風波起誰能釣舟煙波裏千年間限鐵臺址
不如流芳向文字州縣之職徒勞耳丈夫封侯待時至
以道事人直如矢豈但弦歌化州里人兮山兮有如此
我願學者梁夫子

金山志略

費震

次梁必大金焦行

太倉一米梁魏中梵王坐處如天宮
碑礫瑪瑙珊瑚重
護法更有諸天龍
醍醐浮香甘露濃
我欲問訊當何從
惟有一席西津風
快哉八九雲夢宵
海門直指扶桑東
金鰲兩角爭英雄
蒜山房客送墨蹤
妙高千偈佛印同
衲衣玉帶知何在
至今詩句撐蒼穹
江山如畫人往已
雲霾浪打寺復寺
華陽真逸曾至止
鶴銘筆法蘭亭似
老綸敗壁扶不起
沙戶祈蠶脩竹裏
處士蝸牛空舊址
留得名山作焦字
年來俗事怕到耳
神尻氣輿隨所至

從渠烏兔走如矢白雲之鄉吾故里桑榆斥鷃安識此
大鵬逍遙問莊子

金山志略

金遁初

金焦行次梁必大韻

江春淮水通吳中深有萬丈天吳宮珠樓貝闕知幾重
魚身人面赤如龍紫雲赫奕青霞濃天帝下降百神從
蛟鯨無端怒生風敕移三山填其胷日躔月緯分西東
戴鰲方知策強雄馬塵轍跡絕遊蹤仙境直與蓬萊同

千濤萬浪插兩峰屹然對拱摩層穹金山蜿蜒勢未已
焦山縈迴藏古寺大覺仙聖所廬止人間畫圖那得似
鏡銅摩青鳥飛起浮圖倒影澄波裏六朝陵闕存故址
百戰功名數行字相去清風半帆耳此身未遊心已至
君詩到手破的矢我詩刻畫慚下里三分之句豈辦此
舉杯一酌問蘓子

金山志略

朱 渙

渙字濟仲

蟻飲研槽歌

晴窗斐几風日舒呼童汲水供蟾蜍涓流入研元穎濡
一蟻蠢蠢爰來趨須臾十百與之俱前後有行不亂踰
宛若徙穴舁腐餘想應燥吻脣頰枯清夢思欲吞江湖
搖尾羞作涸轍呼奮迅恰如東海魚物生天地小大殊
飢食渴飲皆同途矧爾有靈非至愚大槐南柯名利區
一夢而覺驚幻虛爾其聽我毋睢盱爾吮既沃腹既腴
歸安其藏勿浪逋階前羣兒正嬉娛以指劃土糜爾軀

題徐禮部家歸去來圖

古木參天叫杜鵑，春愁渾在夕陽邊。
看君此畫還三歎，憶得西江上水船。
以上前賢小集拾遺

項詵

詵字宜甫

便橋泊舟

身寄一葉舟，擾擾又行役。
不知寒襲人，但覺酒無力。
霜剝岸石裂，風激水波逆。
望眼浩無涯，遠山相對碧。

前賢小集

拾遺

李清叟

清叟縉雲人

金庭觀

山屬蓬壺第幾重
奇峰翠岫繞靈宮
雲藏毛竹深深洞
煙起香爐裊裊風
放鶴已歸天漢上
養鵝無復小池中
羽人盡得飛章法
神與寥陽路暗通

剡錄

蔡宰

宰字仲平

望洞陽

歲事今無幾清霜苦見侵
寒深落雁渚風急擣衣砧
翠縠紋秋水斑綃纈霧林
洞陽棲隱地樓觀白雲深

前賢小集

拾遺

李謙

謙字恭甫

秋懷

西風入商管衆木夜有聲候蟲竟何為聒聒終夕鳴彼
亦有所思感此歲月征人生豈異適長嘯一拊楹

敗壁鳴莎鷄涼月照虛堂南鄰機杼聲熠燿燈火光遙

聞誰家砧已趣公子裳佳人在何許葉落山中霜

前賢
小集

拾遺

郭從範

從範字世模

烏衣啼

碧煙障樓天欲暮飛鳥夜絕蕪城戍雲外畢逋銜泥來
月明膈膊同枝語樓中有人輟機杼玉笙怨咽凝江霧
惆悵幽懷夜未闌桂樹秋風蘭葉露前賢小集拾遺

歐陽光祖

和朱文公九曲權歌九首存一

玉女峰臨二曲流剗心學道幾春秋東風不信心如鐵

卻放石楠花滿頭武夷詩集

趙民則

題張家店壁

舍策投牀睡便濃
覺來涼葉動西風
驚秋念遠無窮意
客裏知誰此夜同

誠齋詩話

潘葛民

葛民字子尚

胡蜨花

風光白日長
胡蜨飛過牆
飛飛不停去何忙
牆外誰家菜花黃
出門不知南陌路
心隨胡蜨尋郎處

前賢小集拾遺

江朝宗

朝宗括蒼人有詩名

梅花

小小人家短短籬冷香溼雪兩三枝寂寥竹外無窮思

正倚江天日暮時

剡錄

黃復之

復之字幼張

過臨平

孤蹤逐浪萍幾度過臨平人語水相應帆移山倒行鷺
飛秋嶼冷虹飲晚川明不是憑詩句丹青寫不成

題扇面六言

峽束天圍漸小林穿日腳微明竹居有徑誰埽水碓無
人自鳴以上前賢小集拾遺

楊冠

上揚州太守

古人肉食無遠謀腰錢騎鶴向揚州春風十里珠簾捲

但看竹西歌吹樓天朝選用詩書帥上策公言須自治
屏翰堅持保障功江淮益壯金湯勢北騎不敢縱南牧
關塞烟迷芳草綠健兒歌舞樂昇平一曲梅花細柳營

揚州府志

李大方

大方字允蹈廬之孫

句

三百年來今幾秋天地自老江自流
笛聲吹起白玉

盤正照御前楊柳碧 可憐一代經綸業不抵鍾山幾
首詩 後院落花人不到黃鸝飛下石榴陰

詩人玉屑楊誠齋云李方叔之孫大方字允蹈
晚得一鷗冠今為雜買場寄予詩一編多有警
句

鄭天錫

天錫字景輔

江西宗派

西江一水活春茶寒谷春燈夜撥花人比建安多作者

詩從元祐總名家宮商迭奏弦邊雁鼓吹都慚井底蛙
身在天南心太史幾番搔首夕陽斜

前賢小集拾遺

宋詩記事卷六十